

auxilio. Et item in praefata epistola: Monet ergo, inquit, apostolus non amplius nos invicem temere judicare. Temere enim judicat, si quis episcopum absque sedis apostolicae auctoritate condemnat, cum ei, ut paulo superius praelibatum est, hoc specialiter privilegium servatum sit.

Praeterea Isidorus mercator de apostolicae dignitatis privilegio atque Romanae sedis primatu haec inter alia evidenti sermone describit:¹ *Synodorum vero congregandarum auctoritas apostolicae sedi privata commissa est potestate nec ullam synodum ratam esse legimus, quae ejus non fuerit auctoritate congregata vel fulta. Haec canonica testatur auctoritas, haec historia ecclesiastica roborat, haec sancti patres confirmant.*

¹ p. 19.